

## थेसलोनिकीलावरालाई पावलए छीनीकाव परींद ओरायो चिथी

पावलए डादाडाव ओसरो चिथीलाव पाँर जाँ यामाबुझिधुवए थेसलोनिके मन्दलीलाव मिँर ख्रीस फरिकाव उहुन्या छयामए उजूनी 'आव सैं हो सैं' लिद जाँ याखर्लेसिज्याव (२ थेसलोनिकी २:१-१२)। ख्वा ख्वाराए 'येसु हतपत ज़ हुन्या ले' लिद झन यायेनर रासूद अइज़ यालिज्याव (३:६-१५)। है जैद पावलए आव चिथील नो पाँर थरैद ओरायो रैं:ज्या। नल खिरीर पसिद दुख दैज्यावरालाई यायुँर सञ्जें:द ओरायो (१:४-१०), सोनो परमेस्वरए ओपाँत थ०रिउ ओतारक लिद यायुँ हुबोरालाई ओरासम्जैव मनी रैं:ज्या (२:१३-३:५)।

१गे पावल, सिलास सोनो तिमोथीराए गेल्योनी थेसलोनिके सहरल लिज्याव मन्दलीलाई गेबाबु परमेस्वर सोनो गेप्रभु येसु ख्रीसनी निमिननी आव चिथी परींद गयाचिजूया। २ परमेस्वर गेबाबु सोनो गेप्रभु येसु ख्रीसनी जेल्योदा नियुँ गराँद जेयुँ होलाँ जैद ओयाचिरक।

परमेस्वरए मिँरालाई न्यायस याफाल्रिजूयाव

३गेनैं गेमैर, जे परमेस्वरए ओपाँत जेयुँ झन ज़ उहुपनाजूयाव, सोनो जे जेल मया दासिद झन ज़ जेखैनाजूयावए, गे जेजूनी परमेस्वरलाई एकतार धन्याबाद चरै:न्या ज़यासो ज़ ताद ले। ४ सोनो जे प्राइँ खिरीर दुखर सहिद परमेस्वरए ओपाँत थ०रिद जेलिजूयावए गे परमेस्वरए ओमन्दलीराए डाक जेजूनी 'आ: चावर लिजूयार' लिद प्राइँलाई ज़ है गेरादोज़या।

५नो जेदैजूयाव दुखराल परमेस्वरए ओन्याय चाव ज़ रैं:ज्या। परमेस्वरए ओराजूयालाव दुखर जेसहिजूयावए, जे ओराजूया दैन्याकावर जेथ०रिरीजूया। ६ नो जेखिरी पसिजूयावरालाई ते नो जेदैजूयाव दुखरानी परमेस्वरए ओन्यायनी ज़ जेखिस फेरैद्यान्या

ले। 7 जे दुख दैज्यावर ते गेस सिप ताद जेयुं होलां तारिज्या। हो बेलाक गेप्रभु येसु बनै यासक्ती ल्यो ओचाक्यारास स्वर्गनी हुद वीं वीं चाँ:ज्याव में:ल सरै:सिद, 8 परमेस्वरस माखैवर सोनो गेप्रभु येसुए चाव ओथा माभै:ज्यावरालाई सजा याएरिज्याव। 9 नोर प्रभुए ओझाकिन सोनो ओसक्तीलाव ओझगैकिन तँदा ताद खर्क ज़ मापुलुसधुन्या सजाल परिरिज्यार। 10 हो छचाम फरी परमेस्वरए छैव उमीराए याक्याँत ओल उमिन ब झन ज़ ज़गैव रै:रिज्या। सोनो ओललाई यायुं हुपूज्यावराए याखार्ल उगुनर झन अचम्बलाव थंरिरिज्या। आव गेरासथैज्याव परमेस्वरए ओपाँत जे ब जेयुं जेसुहुबोए नोराए याखार्ल जे ब जेतारिज्या।

11 है जैद परमेस्वरए जेलाई उखुल्चिउल उयुंलाव मितावर ओजैचिउक, सोनो परमेस्वरए ओपाँत जेयुं हुपूद चाव येन दाव जेपैज्याव भरिल ओल ओसक्तीनी ज़ सयोद ओयाचिउक लिद जे जेजूनी परमेस्वरलाई एकतार ज़ गोपोंखारिज्या। 12 हो ताकिन ची गेप्रभु येसु ख्रीसए उमिन जे जेल्योनी ब चाव रै:रिज्या, जे ब ओल उमिननी चाव जेरै:रिज्या। आव भरी गेपरमेस्वर सोनो गेप्रभु येसु ख्रीसनी नियुं ओगराँवनी ज़ ओताक।

## 2

### परमेस्वरकिन तँदा जैसिज्याव

1अ गेनै गेमैर, गेप्रभु येसु ख्रीस फरी उहुक गे ओलस दुप्सिद सिप गेतारिज्यावए जूनी तोबो पाँ है गेदाचिज्या। 2 रूवा रूवाराए, 'गेप्रभु येसु ख्रीस उहुन्या छचाम ताधुके' है लिज्यार। नितावराए गे गेमिन कुद इताव चिथीर यापरीकिन सोनो जेल्योक हुद, 'इताव पाँर परमेस्वरए उपुरूसनी ज़ गेदैके,' है यालिदी ब नोराए यापाँ पतिद जेयुं आँचा पाँचा ताजैच्यो। 3 सुवाराए ल्योनी ब ताझुकिच्यो। मानुवा भरी परमेस्वरकिन तँदा जैसिद परमेस्वरए ओकानुन

माभैःज्याव नुल्या मिँ ओमासरैःसिवा पै नोकिन झादा गेप्रभु हुन्या माले। ४ नो तँदा जैसिज्यावए मानुवाताव मिँराए यामानिज्याव देवताराकिन ओल ज़ सघ्योःसिद, परमेस्वरकिन ब स०द ध्यान झिमल चुसिद, 'परमेस्वर डा ज़' है लिन्या ले। ५ जे जेमामेंःज्याखेहो, आव पाँ भरी जेस डालिज्याक है दाव ज़ डानैचिज्याव। ६ नो मिँ ओसरैःसिन्या बेला ओमातावा पै नोलाई वेंद नैज्याव 'आवए ज़' लिन्या ब जेसैज्या। ७ खाली नो वेंज्यावए येम ओमारासा पै नो मिँ माहुधुइ। परमेस्वरकिन तँदाडाव येन ते आज्याल ब उजील उजील ताव ज़ लिज्या। ८ येम ओरासोत वाज़ बल्ल नो परमेस्वरए ओकानुन माभैःद तँदा जैसिज्याव मिँरैःन्या ले। नोलाई गेप्रभु येसु ओज़गैस ओसरैःसिहुक उस० ह्वास ओजैव प्राइँना ज़ नो मिँ होक ज़ सिद उमिन ज़ मान्या ले। ९ नो मिँए ओयेन भरी सैताननिकाव ओतावए सैतानए ओसक्ती रैद अचम्बलाव येनर चेतकर ब सतैँहुरिज्याव। १० नर्गलाव येमदा बाज्यावराए परमेस्वरए साचो ओपाँलाई माभैःद बाँचैन्या येमलाई यासोवए नो मिँए ओछलनी प्राइँ किसिमलाव धुतर पलेःद याझुकैरिज्याव। ११ है जैद परमेस्वरए मनी 'निताव धुत पाँलाई ज़ घपतिज्यारक ते' लिद मुन्दुक्यासो तान्या सराप ब याएरिज्याव। १२ साचो पाँलाई यायुँ माहुपद मादान्या येनदा यायुँ थू जैज्याव भरी ननी ज़ परमेस्वरए ओसजाल परिन्या लेर।

### परमेस्वरए ल्योदा बान्या छाँतिसिउर

१३अ प्रभुए उयुँलाव मिताव गेनैँ गेमंर, जेजुँनी गे एकतार परमेस्वरलाई धन्याबाद चरैःव परिज्या, काराव ल्यो ताकिन परमेस्वरए साचो ओपाँत जेयुँ जेसुहुपज्याव सोनो छैँव पुरूसए जेलाई छैँवर ओजैचिउनी जेलाई झादाकिन ज़ अजम्बरी जुनी

ओलस ज़ दैन्या छाँतिद नैचिउ। 14 हो येमल बान्याए जूनी ज़ गे गेसथैचिज़्याव चाव थानी परमेस्वरए जेलाई खुल्द नैचिउ। ननी ज़ गेप्रभु येसु ख्रीसए ओज़गै जे ब जेदैरिज़्या। 15 है जैद गेनें गेमें, जे गेल्योनी जेपैसिउ भरी, गया:नी तादी ब, सर्सिउ चिथीनी तादी ब जात ज़ मारास्द नत ज़ थंरिद लिच्यो।

16-17 गेप्रभु येसु ख्रीस सोनो गेबाबु परमेस्वरए जेलाई चाव जेयेन, चाव जेपाँ भरिल जेयुँर होलाँ जैद्याद थंरिउ युँ ब जैद ओयाचिउक। गेबाबुए गेल्योदा उयुँ थू जैद उयुँ ओगरावनी ज़ गेलाई अजम्बरी जुनीए आस याद गेयुँ सज़े:द्यासिक्यो।

### 3

#### गेजूनी पोंखारिद्यासिच्यो

1अ गेनें गेमें, फरी ब गेपाँ तोबो लिज़्या, गेजूनी पोंखारिद्यासिच्यो। जेयुँ हुपूद जेयुँल जेरैव मिताव, प्रभुए ओपाँ प्राईदा चाँदो ज़ घरा:सिक, उमिन ब प्राईदा ओध्यो:नाक। 2 परमेस्वरकिन तँदाडावर सोनो ओपाँ सोज़्यावराए ल्योनी पाथस पुलुसो गेदैक। परमेस्वरए ओपाँत यायुँ माहुबोर कुधु ज़ लिज़्यार। 3 हितावत ब प्रभुयुँ हुबो ज़ लिज़्या। है जैद जेलाई मनी प्राईत ज़ थंरिउ जैद माचाव भरिरानी जोगोइद पाथस नैचिरिज़्याव। 4 'है गेदाचिज़्याव भरी मारास्द दाव ज़ जेनैज़्याखेहो' लिद जेजूनी गेप्रभुए ल्योदा गेयुँर हुबो ज़ लिज़्या। 5 परमेस्वरए जेयुँ ओल्योदा झन ज़ जैद ओयाचिउक, सोनो ख्रीस उथंरिउ मिताव जेलाई ब थंरिउर ओजैचिउक।

#### चाव येनत जेर्सा तासै:च्यो

6अ गेनें गेमें, जेलाई गेप्रभु येसु ख्रीसए उमिननी गेअथैचिज़्या, आव गेपैचिज़्याव पाँर मातीज़्याव अल्सी जेनेरानी जोगोइसिद अच्छतड लिच्यो। 7 बुरू गे जेल्योड गेलिकाव गेदोव मिताव येन जे ब दोचिके। जे ज़ जेसैज़्या, गे जेस गेलिज़्याक येन दान्या अल्सै गेमादोए। 8 सुए ल्योनी ब अइज़ गेमाज़्युए। बुरू सुलाई

ज़ प्रेरैव तापरिक लिद बनै दुखस लाकनी रील येन दाद गेजिउ गेडाके। 9 गेलाई चाहिज़्याव भरी जेल्योनी दैन्या हक ओमाल्योए ते माःक। खाली गे स्यासो घदोरक लिद गेदोव येन भरी जेडाक सतैद गयाचिके। 10 जेस गेलिज़्याक ब, 'जोए येन मादोव, होए ज़्यान्या ब ताज़्युवक,' है दाव ज़ गेनैचिज़्याव। 11 हितावत ब जेनी ख्वा ख्वाराए येनत यामी सैःद अइज़ चुसिद यानैरालाई यारातोबोलैज़्यार दी लिन्या गेथैज़्या। 12 निताव मिँरालाई गेप्रभु येसु ख्रीसनी गेराअर्थैज़्या, यायेन सुरू सुरू दाद याभूँदी याज़ ओडारक। 13 जे भन्या गेनै गेमैर, चाव येन दान्यात जेसा तासैःच्यो। 14 सुवाराए आव गेपरींज़्याव चिथीलाव पाँर यामाभैःकिन जे नो मिँलाई सरेस्द ओयेनए ओल ज़ लाज मोर्नो घताक लिद ओलस खदेप तालिच्यो। 15 खाली नोलाई सुतुर स्यासो जैन्या ते माःक, बुरू क्याँए भाइ स्यासो जैद नोलाई सिडारो ताके।

### तुपैन्या पाँर

16 अब प्राइँ युँ होलाँ जैज़्याव गेप्रभुए जेलाई प्राइँनी प्राइँनी एकमन्या जेयुँ होलाँ जैद ओयाचिउक। सोनो परमेस्वरए जेस ज़ बास ओदोवक।

17 डा पावलए डाचिथी भरित डासही छाप डाझाःज़्याव मिताव आव चिथीत ब डासही छाप झाःद डानै। ननी ज़ 'ओल ज़ उपरींव ओल्यो' लिन्या सैन्या जेले।

18 जेल्योदा गेप्रभु येसु ख्रीसए उयुँ ओगराँक।

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd